

Aruba lo sinti efecto si Gabinete Hulandes dicidi pa retira pa motibo di caso opvangtoeslag

Ley di COHO ainda ta riba mesa di Mark Rutte



E palabracionnan pa continuidad di sosten di likides y e entidad di reforma y desaroyo, COHO ta riba mesa di Minister pa Asuntunan General, Promer Minister di Hulanda Mark Rutte. Pero con concreto por conta riba e palabracionnan ta depende di e decision si e Gabinete Hulandes ta keda of si ta entrega retiro.

Gobierno Hulandes ta confrontando un reto grandi, cu ta, mancha e crisis di COVID-19. Pero tambe un inhumana cometi door di Gobierno, particularmente Servicio di Impuesto contra un cantidad di mayor cu a bira victima di un maneho discriminatorio riba kinderopvangtoeslag.

Drama opvangtoeslag

Na 2005, Servicio di Belasting a haya responsabilidad pa paga e toeslagen, cu mester a bay robes pa motibo di sistemanan. Na 2009 a bin señalnan cu a haci abuso cu e toeslagen. E asina-yama gastouderbureaus (e persona intermedio entre mayornan di un mucha y e persona cu ta cuida e mucha. E oficina ta trece e partidonan hunto), ta informa mayornan con por pidi e toeslag, hasta ora muchanan ta bay na welonan, sin cu mester paga nan mesun contribucion. Di e forma aki e oficinanan malafide aki ta cobra ilegalmente. Servicio di Belasting a bay tras di e mayornan cu no a paga nan contribucion, y Corte a duna e ordo pa paga e placa back. A bin un medida antifraude cu

a crea teamnan special pa bay tras di e oficinanan, pa permiti e proceso bay mas lihe.

For di 2013 sinembargo, tabatin señalnan regular cu e maneho contra fraude aki tin consecuencia pisa pa cierto mayor. E Ombudsman a traha un rapport specifico riba e situacion aki na 2017. Tabata mira e casonan aki como incidental. Pero tabata despues di pregunta di Tweede Kamer y abogado di algun mayor y periodistanan di Trouw y RTL cu a mira cu e problemanan tabata mas grandi. Miles di mayor a perde tur cos, hasta

perde nan yiunan sin motibo. Gobierno Hulandes pa dicidi pa compensa esnan cu a sufrir daño, pero e proceso ta cana lento. Un rapport 'Ongekeend onrecht' a keda presenta na Ddecember, 2020 unda a caba cu e maneho di e diferente gabinetenan Hulandes riba e tema aki. E miles di mayornan ta pidi Gabinete Hulandes pa asumi responsabilidad y tuma retiro.

Diabierna awor, Gabinete Mark Rutte ta reuni pa discuti e consecuencianan di e affaire aki, unda ta hasta considera retiro di e gabinete

completo. E partidonan di coalicion ta tene cuenta cu e gabinete mester bay pa motibo di e sufrimento di e victimanan, pero no ta de acuerdo riba e paso extremo di retiro pa motibo di e crisis di corona. E partidonan di coalicion ta di acuerdo cu no ta bay sacrifica un solo Minister, pero cu tur lo mester bay. VVD di otro banda ta bisa cu si e Gabinete bira demisionario, e maneho di coronavirus lo mester continua.

Efecto pa Aruba

Na e momentonan aki tin dos rijkswet riba mesa, e Rijkswet Financieel Toezicht Aruba, RAft y mas importante, e rijkswet Caribisch Orgaan voor Hervorming en Ontwikkeling, cu mester yuda e reforma y resiliencia di economia y sociedad di Aruba. Ainda e leynan no ta cla. E palabracionnan pa sosten di likides y pa e crisis di corona tin su limite y na momento cu of si Gabinete Hulandes cay diabierna, no ta conoci kico lo pasa cu e palabracionnan.

Siman pasa ainda, Secretario di Estado Raymond Knops a bisa cu no por compromete e siguiente Gobierno Hulandes cu mester bin despues di maart. Lo tin eleccion na maart. Sinembargo, si Gabinete Mark Rutte cay, e Gobierno ta bira demisionario y no por tuma decisionnan nobo. E palabracionnan haci

lo sigui, pero no por ehempel, un decision pa extende e ayudo medico pa COVID-19 na hospital, y extension di e servicio di especialista y nurse-nan di exterior cu ta yudando Aruba pa atende cu esnan afecta pa e pandemia.

Bon Dia Aruba a tuma contacto cu vocero di Secretario di Estado Raymond Knops, Emile Vaessen kende a bisa cu Gabinete Hulandes no a tuma ningun decision pa retiro ainda. Ademas, cu e palabracionnan cu Aruba awor ta den man di Minister Presidente Mark Rutte. Den caso cu e gabinete tuma retiro, Tweede Kamer lo dicidi cu palabracion lo por continua. Tweede Kamer lo tuma decision cu ta temanan controver-sial. Na momento cu e gabinete bira demisionario, sea ta despues di diabierna of na maart, comisionnan di Tweede Kamer lo reuni pa determina cua tema ta controver-sial of no. Esakinan ta proposicionnan di ley, AMvB (Algemene Maatregelen van Bestuur). Tweede Kamer ta dicidi riba e lista pero si kier trata e temanan controver-sial, lo mester haya aprobacion di mayoria.

Den otro palabra, Aruba lo ta depende di disponibilidad di mayoria di Tweede Kamer pa continua cu e rijks-wet COHO y otro palabracionnan di sosten.

